

Extract dil protocol della radunonza da pleiv dils 1 da mars 1974.

All'ura fixada arva sgr. pres. la radunonza beneventont ils presents, ed admetemt spezial salid e beinvegni als plevons Sur Giusep e Sur Martin. Ils fatgs della pleiv havessan schau spetgar impau dapli bunaveglia ed interess tier ils stimai parochians. Suenter ina cuorta orientaziun generala vegn passau tier las tractandas.

1. La constituziun da pleiv preparada dalla suprastonza en colaboraziun cun nos spirituals vegn prelegida. Tier scadin art. vegn dau caschun per pœpostas da midadas ed amplificaziuns. Cun entginas pintgas correcturas vegn la constituziun approbada cun tscharna unanima.

2. Sco secunda tractanda suonda la prelecziun dil niev regulativ da taglia per la pleiv. Il modus da taxaziun sco practicaus dapi 6 onns, vegn recepiv senza midada el niev regulativ da taglia. Suenter ina discussiun generala vegn era il regulativ da taglia per la pleiv approbaus dalla radunonza. Constituziun e regulativ da taglia ston aung vegnir suttamess al cussegl administrativ cant. della baselgia catolica, sco era alla canzlia episcopala per approbaziun.

3. Sco revisurs da quen per la pleiv vegnan proponi ed elegi, sgr. Rudolf Cavegn Sedrun e sgr. Conrad Berther Rueras. Sgr. Robert Schmid Sedrun e sgra. Luzia Berther Rueras vegnan elegi sco suppleants dils revisurs. Las uras eran pulit avanzadas cura che il pres. sa concluder e serrar la radunonza, engraziant a tuts participonts e giavischont ina buna notg.

Cun quella caschun vuless la suprastonza da pleiv prender suenter ina obligaziun. A siu temps ha la radunonza da pleiv giu concludiu la restauraziun della baselgia da s. Vigeli, e surdau quei pensum ad ina commissiun, cun ils signurs plevon Sur Giusep Durschei, gerau Meinrad Gamboni ed ugau baselgia scol. sec. Leci Jacomet. Quels signurs han cun grond plascher ed anim priu amauns la caussa. En in interval per ina semeglionta lavur zun limitau ei la prevedida restauraziun vegnida exequida. Giuvens e vegls, jasters e dumiasstis ein plein laud e laian plascher la beingartegiada lavur.

En num dalla entira cuminonza da pleiv admettein cheutras, als commembers della commissiun il pli grond e sinzer engraziament e renconuschientscha, per la gronda lavur, stenta e capiementscha, demussada e realisada tier la restauraziun da nossa baselgia parochiala.

In grond engraziament auda era a tuts sorprendiders, mistergners e manuals che han exequiu las diversas lavurs da restauraziun. Ei ha duvrau organisaziun, colaboraziun e bia bunaveglia tier in e scadin per dumignar quella lavur en aschi cuort temps.

Nus engraziein era a tuttas vischinas e vischins, che han priu peda ed unfriu bia temps cun gidar tier las empremas lavurs da preparaziun, cavar ora fundamentals ect., e medemamein era a tuttas e tuts che ein segidai alla fin della restauraziun cun schubergiar e cavegliar tut en uorden.

Engraziar vulein nus era a tuts benefactors, pigns e gronds che han gidau e gidan vinavon a cuvierer ils cuosts da restauraziun.

Nies preziau Sur plevon, sco era igl ugau baselgia meretan in sinzer e cordial engraziament spezial, per la gronda lavur e quitau finanziel.

La pleiv entira astga esser loscha oz da sia bialla beinrenovada baselgia parochiala.

Il president:

La actura: